

TE HEHEURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 5.

Me 1929.

Mat. 23.

“Ua parau atura Iesu ia'na, na ô atura, E ao to oe, e
Simona Bare-iona, e ere ta te taata i faaite mai ia oe i te
reira, na tau Metua râ i te ao ra.”

“E parau atoa tu vau ia oe, O Petero oe, e ei nia iho i
teie nei papa (heheuraa) e patu ai au i tau ekalesia, e e ore
roa ia e noaa i te uputa o hade.” (Mataio 16:17-18)

Te Faaroo no te Feia Mo'a Mau.

Ua iritihia teie nei parau na roto mai i te buka: “Te Hiro'a Faaroo”
tei papaihia e Tamate Aposetolo; Faaauhia ei reo Tahiti e Elita.

HIRO'A FAAROO 9. Te faaroo nei matou i te mau
parau i heheuhia mai e te Atua i mutaa ihora, e te mau pa-
rau ta'na e heheu mai i teie nei, e te faaroo nei hoi matou e,
e riro â Oia i te heheu mai i te hoê atu â mau parau maitai e
te faufaa rahi i to'na ra basileia.

UIRAA 1. Eaha te heheuraa?

P. O te faaiteraa ia i te parau moá mau na roto i te
parau no te raí mai.

Parau Tauturu: O te heheuraa ia te auraa o te Apo-
kalupo o tei papaihia e Ioane, e tei roto i taua buka ra te
tahi no te mau heheuraa i horoahia maira i Ta'na mau tavi-

ni. Na te huru o te taata e faataa i te huru o te heheuraa e nehenehe ia'na ia farii, oia hoi, mai te mea e taata tiamâ e te viivii ore oia, ua nehenehe ia'na ia farii i te heheuraa hana-hana roa; mai te mea râ, e taata haapao ore oia aita paha te Atua e horoa i te mau mea maitatai ia'na.

Na roto i te heheuraa e ite papu ai tatou e, e Atua mau to tatou Metua, e ua hamanihia te taata i roto i To'na iho hohoâ, no reira ua nehenehe ia tatou ia haamori atu Ia'na mai te ite papu i te huru o te Taata ta tatou e haamori atu nei.

Uiraa 2. E mea nahea te Atua i te parauraa mai i te taata nei?

P. Ua parau mai Oia na roto i te heheuraa i horoahia i Ta'na ra mau tavini i te mau peropheta.

Parau Tauturu: I te mau taime atoa a ora ai te hoé taata maiti-mau-hia e Iesu Mesia i nia iho i te ao nei, ua horoahia te heheuraa ia'na ei aratai e ei tauturu no'na i te ohipa a te Fatu. Aita râ e nehenehe i te taata ia parau i roto i te i'oa o te Metua maoti râ ua maitihia oia e te tahi tei haamana-mau-hia.

Tei to te Autahuâraa te mana no te paraparauraa'tu i to te rai; e ua ravehia te reira na roto i na ravea e maha, oia hoi:

- 1- Te Orama
- 2- Te Moemoe meta
- 3- Te Farerei meta i te mau melahi
- 4- Te Farerei-mata-noa-raa i te Atua.

Ua riro te mau parau na ratou o te parau mai na roto i te faaârûraa o te Varua Maitai ei mau parau moâ mau. Ua faaite maira Amosa e, "Aita a te Fatu ra a Iehova e peu i râve maori râ ua faaite i ta'na parau i moé i ta'na ra mau tavini i te mau peropheta." (Amosa 3:7) E na roto i taua parau nei ua faaite maira te Atua e, te faatura noa nei oia

i ta'na ra mau peropheta i to ratou toroa.

Uiraa 3. Ua horoahia maira anei te heheuraa i mutaa ihora?

P. Oia mau ua horoahia maira te heheuraa i te mau taata e rave rahi. O Adamu ia te taata matamua tei farii mai i te heheuraa --Genese 2:15-20. Ua farii atoa mai Enoha i te heheuraa --Genese 5:18-24. Ua na reira atoa Aberahama, Mose, Iosua, Daniela, e o Ioane Bapetizo e tae noa'tu i te Mesia ra.

Parau Tauturu: Ua farii atoa Iesu i te heheuraa no te rai mai no te mea te na ô maira Oia e, "E ere hoi i ta'u iho te parau ta'u i parau atu na, na te Metua râ i tono mai ia'u nei ra i faaue mai ia'u i te parau ia parau vau e ia haapii au." (Ioane 12:49) "Ia ite râ to te ao e, te hinaaro nei au i te Metua, e te haapao nei au i ta'na i faaue mai ia'u ra." (Ioane 14:31) Ua na reira atoa maira te Apose-tolo na muri mai i te revaraa'tu o Iesu e te na ô maira Ioane e, "Tē apokalupo a Iesu Mesia, ta te Atua i tuu mai ia'na ra, ia faaite oia i ta'na mau tavini i te mau mea e fatata i te tupu ra; e ua tono maira oia i ta'na melahi, e ua faaite maira i to'na nei tavini ia Ioane. (Apokalupo 1:1)

(Tuatihia teie nei parau.)

Te Ravea no te Tomoraa.

I A FERURI TATOU i nia i te ravea no te tomoraa i roto i te Basileia o te Atua, ua au ia i te ravea no te tomoraa i roto i te hoé basileia no te ao nei.

Nahea te taata no rapae i te Basileia Farani e riro ei melo no te Basileia Farani, maori râ, ua tupu na mua to'na faaroo i te vahi e, ua hau roa'tu te maitai ia'na iho ia riro oia ei melo no te Basileia Farani, oia hoi, ia tupu to'na faa-

roo i te Hau Farani e tia'i. Mai teie atoa te vahi matamua i titauhia no te tomoraa i roto i te Basileia o te Atua. O te faaroo ia te parau matamua.

Te piti; ua titauhia ia faaore oia i to'na tiaturiraa e to'na raveraa i te mau mea au ore i roto i te hióraa o te basileia ta'na i hinaaro ia tomo, e ia tupu to'na manaó papu, eita oia e tiaturi e aore râ rave faahou i te reira mau mea au ore, oia hoi, ia tatarahapa oia e tia'i.

Ia oti teie na parau matamua, te faaroo e te tatarahapa, ua ineine te taata titau tomoraa i te farii i te tapao no te tomoraa. Te tapao no te tomoraa i roto i te Basileia Farani, o te parau-tapu-raa ia ia haapao e ia tiaturi oia i te mau ture e i te mau faaueraa no taua basileia nei. Ia fariihia teie tapao, i reira ua faaore-mau-hia to'na tiaturiraa i te mau mea tuatihia i to'na tiaraa matamua, o tei ore i au i te Basileia Farani. Te tapao no te tomoraa i roto i te Basileia o te Atua, o te baptizoraa ia, e e faaiteraa ia e haapao e e tiaturi oia i te mau ture e i te mau faaueraa no te Basileia o te Atua. E ia farii oia i teie tapao, oia hoi, te baptizoraa, ua faaorehia ta'na mau hara.

Ia oti to'na fariiraa i te tapao tomoraa, i reira e horoahia'tu ia'na te mau mea i au no te melo i te reira basileia. E horoahia'tu i te taata tomo i roto i te Basileia Farani i te parururaa o te Hau Farani, e e horoahia'tu i te taata tomo i roto i te Basileia o te Atua te Varna Maitai i te tauturu e i te paruru ia'na.

No reira, ua ite tatou e, ua titauhia teie na parau e maha, oia hoi, te faaroo, e te tatarahapa, e te baptizoraa (te tapao no te tomoraa), e te tuuraa rima no te fariiraa o te Varna Maitai (te mau haamaitairaa no te basileia), no te tomoraa i roto i te hoé basileia, noa'tu, te Basileia o te Atua e aore râ te tahi atu basileia.

—*Papaihia e Viliamu*

No te Aha Iesu i Tae mai ai?

Ua faaroo a'enei tatou i te uiraa i faaitohia i te upoo parau, oia hoi, "No te aha Iesu i tae mai ai?" "E no te aha oia, e Atua, i tuu atu i to'na ora, na roto i te mamae e te oto, a vai noa'i te mana i roto ia'na ia faaore i te pohe ra?" Ua pahonohia to tatou uiraa i te mau pahonora ra e tei mua ia tatou nei te mau aamu e rave rahi o tei faaitohia i nia i taua uiraa ra. I teie nei taimera, e tuu tatou i te tahi vahi no te reira i mua ia tatou, e teie mai ia, ua haamana'o pinepine anei tatou i te haapiiraa ta Iesu i tuu mai i nia iho i te reira vahi?

I ropu i na iri tapoi o te Bibilia Mo'a ra e ite tatou i te ho'e mau parau nehehe roa o te tauturu ia tatou i to tatou feruriraa i nia iho i te uiraa rahi i faaitohia ra. E ia oti to tatou tai'ora i ta Iesu mau parau i roto i taua buka mo'a ra ia imi atu tatou i te mau parau o te tauturu, i roto i te tahi atu a mau buka mo'a, e tia'i. Na mua ra e haamana'o tatou i te parau i roto i te Bibilia. I roto i te Luka e ite tatou i te ho'e parau no to Iesu faaearaa i roto i te hiero mai te paraparau i te mau orometua i reira ra. Ia'na i itehia'i e to'na ra na metua, ua parau maira te metua vahine na o maira; "E tau tamaiti, eaha oe i na reira mai ai ia maua? Inaha i imi noa na maua o to metua tane ia oe ma te oto."

Ua pahono atura Iesu na o atura, "Eaha orua i imi ai ia'u? Aita orua i ite, e ia haapao vau i ta tau metua e tia'i?"

Ua maere te mau taata i te reira parau i te mau tau atoa mai te taimera i parauhia mai a, e feruri ra tatou i nia iho i te reira no te fau'aa rahi i roto i te reira i te pahonora i ta tatou uiraa. I roto i te parau a Iesu e tupu ia tatou nei teie na uiraa. 1- Eaha ia to to'na metua hinaaro? 2- O vai ia to'na metua ra?

I na matahiti i muri mai i te reira taime ua parau atura Iesu i to te ati Iuda e, "I pou mai nei hoi au mai te raí mai e haapao i to tei tono mai ia'u nei hinaaro, eiaha to'u iho hinaaro." Ua nehenehe ia tatou ia parau papu e, ua haere mai Iesu ia haapaohia to tei tono mai ia'na hinaaro. I te taime hoi i parauhia taua parau i papaihia i nia nei, ua na ô atoa'tura Oia e, "Teie hoi to te Metua to tei tono mai ia'u nei hinaaro, ia ore roa vau ia ere i te hoé i ta'na i horoa maira, ia faatia-paatoa-hia e au ia tae i te mahana hopea ra. O teie hoi to tei tono mai ia'u nei hinaaro, o te ite i te Tamaiti e te faaroo ia'na ra, ei ora mure ore to'na; e ia faatia faahou vau ia'nai nia, ia tae i te mahana hopea ra." (Ioane 6:39-40.)

Ua pahonohia te hoé o to tatou na uiraa. Ua hinaaro to tei tono mai Iesu, ia ora tei taatoaraa o tei horoahia ia'na (Iesu), ia faatia faahou oia i te mau taata atoa i nia o te ite e te faaroo ia'na ra, oia hoi, e ora mure ore to ratou.

Te piti o to tatou uiraa e pahonohia ia na roto i teie, te faaitehia mai nei; "E tau Metua, ua tae i te hora; a haamaitai i to Tamaiti, ia haamaitai atoa hoi to Tamaiti ia oe. Ua horoa mai hoi oe i te mana no'na i te taata atoa nei, ia horoa'tu Oia i te ora mure ore i te feia atoa ta oe i horoa mai no'na ra. Teie hoi te ora mure ore, ia ite ratou ia oe i te Atua mau ra, e ia Iesu i te mesia ta oe i tono mai." Ioane 17:1-3. Ua tae mai Iesu, ia ravehia to to'na Metua hinaaro, e te hinaaro o to'na Metua o teie ia, mai ta te Atua iho i parau maira, "Inaha na, o teie ia ta'u ohipa e to'u hanahana ia faatupu i te tahuti ore e te ora mure ore a te taata atoa." Mose 1:39 (Buka Poe Taoá Rahi). No reira Iesu, e Atua, i tuu atu i to'na ora, ia ora te taatoaraa o tei horoahia mai no'na ra.

— *Papaihia e Toma*

Te Faatura i te Ture.

TEIE MAI NEI te parau aratai no te Pupu Feia Api no te Ekalesia a Iesu Mesia i te Feia Moá i te Mau Mahana Hopea Nei, no te matahiti 1929: *Te faatura nei matou i te ture: e te mau taata o tei haapao i te reira i to ratou oraraa, e te mau taata mana hoi o tei haamana i te ture.*

Te ravea hau aé i te mau ravea atoa o tei horoahia mai i te taata ia noaa te oaoa, o te imi mau ia i te mau ture no te ora e haapao mau hoi ia ratou. Na te reira hoi i noaa mai te oaoa huru rau i te mau taime atoa.

E parau mau hoi tei papaihia i nia nei, no te mea te ite i te ture e te faaturaraa i te reira, o te haamataraa e te niu ia o te haereraa i mua. Ia ore te ture, na te feaa e te ite ore e faatere. I te tau tahito, oia hoi, i te tau i parauhia *Te Tau Poiri* e te mau taata papai parau tuatapapa, aita te mau taata i ite i te ture o tei faatere i te ao. I taua mau mahana poiri ra ua parahi mai te mau taata ma te feaa e te mataú, ua riáriá to ratou parahiraa i te ohipa hióhió e te tahi atu mau fifi i tiaturihia e ratou tei ora i taua tau ra, no to ratou ite ore i te ture e vai noa'i to ratou mataú. Ua ere ia ratou i te oaoa.

I te mau tau atoa a haapao-ore-hia'i te ture o te hau, ua tupu te viivii e te orurehau i nia'é i te fenua. E i te mau tau atoa a farii-ore-hia'i te ture moá, ua parau te mau taata i te mau parau faufau i nia i te Atua, e ua pohe atura ratou i te poheraa riáriá e te tiaturi ore. Ia feruri râ tatou i nia i te tahi pae, oia hoi, ia haapaohia te mau ture, noa'tu e, e ture natura, e aore râ e ture hau a te taata nei, e aore râ e ture moá; ua tupu te hau, e te vai ra te haereraa i mua, e no teie na mea, ua tae te taata i te tiaraa teitei o te oaoa.

Te hau maitai o te tahi ia i'oa no te ture, no te mea o te hopea ia o te ture. Ua faatere-noa-hia te mau fetia, e te

mau taurua o te raí i raro aé i te ture, e te haere noa ra ratou i to ratou mau haereraa ma te hau e te peapea ore, ia nehenehe i te mau taata haapii fetia ia faaite mai i teie matahiti, i to te hoé fetia vairaa no na matahiti na muri nei. Te mau tufaa rii o te mau mea atoa e vai noa ia i roto i to ratou vairaa mai te peapea ore, e te raverave ra ratou i te ohipa i horoahia mai ia ratou i raro aé i te ture. Te tupuraa e te pê; e te ora e te maí; e te oaoa e te oto, o te mau faaiteraa ia no te vairaa o te ture. Te tamata-feaa-raa o te hoé ia i'oa no te ture ite-ore-hia. Te ora nei râ te taata i nia i te ao nei mai te feaa ore, no te mea ua tae te ite ia'na e, na te ture mure ore e paruru ia'na, ia noaa te ite mau o te reira.

“Ua horoa mai Oia i te ture i te mau mea atoa, ia haere-haere ratou i roto i to ratou iho mau tau e to ratou iho mau taime.” Buka Fafau 88:42.

Ua faaite-atoa-hia maira i te peropheta o Iosepha Semita.

“Te vai ra te ture o te tuu-mana-hia mai i nia i te raí hou te faatunu-raa-hia o teie nei ao, o te niu ia no te mau haamaitairaa atoa * * * *. E a farii ai tatou i te hoé haamaitairaa no ô mai i te Atua, na roto mai hoi te reira i te haapaoraa i te ture o te riro ei niu o taua haamaitairaa ra.” Buka Fafau 130:20-21.

Te faaea nei te taata i raro aé i te faatereraa o te ture. Na te reira e faaite mai te ravea i te oaoa; o te hau ia o te ao atoa. E na te reira atoa i faaite hua mai ia'na e, a vai ai te ture, aita e nehenehe i te taata ia tapuni mai te farii ore i te utua no ta'na ra mau ohipa. Ua nehenehe ia parau e, o te ture ia te paruru e te faautuaraa.

I roto i te haapaoraa i te ture te vai nei to te taata nei ravea. E aufau iho â oia i to'na utua no te mau mea atoa ta'na e farii, area râ ia maiti oia i te haapaoraa i te ture, e

farii
atoa.
Ua p


e haa
na.”

farii oia i te faufaa mure ore, no to'na mau tamata-mau-raa
atoa.

Ua parau maira te Fatu:

"Amene, amene, te parau atu nei au ia outou, maori râ
e haapao outou i ta'u ture eita enoaa ia outou teie hanaha-
na." Buka Fafau 132:21.

--W.



Te Mau Parau Apî

Ua faaitehia mai na roto i te vea, e tamata o Tien Lai Huegn, Tinito, te hoé taata faatere pahi reva, ia mau e i roto i to'na pahi reva mai te fenua Amerika e tae roa'tu i te fenua Tinito. E 9,000 maile ia te area i ropu i teie na fenua, area râ, e tapae oia i Vaihi e i te tahi motu (Midway Island) o tei ropu i te fenua Amerika e i te fenua Tinito. Noa'tu i to'na na tapaeraa e piti i manaóhia, e ere teie tere te mea ohie.

O teie te tahi parau huru ê, e te maere hoi, ta te vea i faaite mai. I te fenua Rumania, ua pohe te hoé vahine ruau, e 118 to'na matahiti e i te taima no to'na poheraa ua ineine oia ia faaipoipohia i te hoé tane. Ahiri aita teie vahine i pohe ra, ua riro teie tane te toru o to'na tane faaipoipo. A ora'i teie vahine, ua fanau oia e 21 tamarii.

Te faatura nei â to Farani i te potii faehau, o Joan d'Arc. I te avae Febuare i teie matahiti hoi, e pae hanere ia matahiti mai te taima mai i ora'i Joan d'Arc i nia i te ao nei, mai te rave i ta'na ra mau ohipa maere. E ua faatura to Farani ia'na na roto i te tuuraa i te mau ofai haamano-raa i te mau vahi ta Joan d'Arc i haere.

E faaapu paha tatou i te moa ia roaa te faufaa ia tatou. Ua tae mai te parau api tei faaite mai ia tatou nei ua faufaa-hia te hoé papaa i te tufaa fenua Colorado i America, no te mea ua heru ta'na moa i to'na imiraa i te maa na'na e a heru ai oia ua itehia te hoé mau moni parau, oia hoi, ua roaa i taua taata nei e 2,700 dala moni Marite. Ua manaóhia na te tahi taata tahito taua moni ra i huna, e ua pohe oia mai te faaite ore i te mau taata i te vairaa no ta'na moni.

Ua manaó paha tatou ua ore ê na te tau no te mau animala oviri tei taparahi noa i te mamoe e i te puaatoro. I roto râ i na avaé e toru i te tufaa fenua Utaha, ua taparihia e 525 animala no taua huru nei. I roto i te reira numera, ua rau te huru no te mau animala, oia hoi; e 67 animala no te utuafare no te piifare e e mea taehae roa atoa hoi ratou. Ua pohe atoa e 208 uri taehae e te tahi atu â animala taehae. No te rahiraa o te peapea tei faatupuhia e teie huru animala te aufau nei te hau i te moni i te mau taata'toa tei afai mai i te mau iri animala ei faaiteraa i to te hau, ua pohe mau tera mau animala ia ratou.

I te ono e i te hitu no Eperela ua faatiahia te amuiraa no te Ekalesia a Iesu Mesia i te Feia Moá i te Mau Mahana Hopea Nei. Tei Papeete te faatiaraa no taua amuiraa nei e ua tae mai te Feia Moá no te paeau Tuamotu i Tahiti, mai te afai mai i te hoé mau haapiiraa hohoá maitai e te nenehe hoi. Ua rahi hoi te oaoa tei tupu i taua na mahana ra no te mea ua farerei te mau taata i roto i te aroha e te ohipa a te Fatu. Ua faaite-atoa-hia te hoé mau parau aratai, e ua tuuhia te tahi mau aóraa Evanelia ei faaitoitoraa i te ohipa maitai. I muri aé i te amuiraa ua hoi te mau taata i to ratou iho mau amaa.

Ua tae mai te parau api tei faaite mai ia tatou ua pohe te hoé taata herehia e tatou, oia hoi, o Maréchal Ferdinand Foch, te hoé papaa Farani. I te tamaí rahi i mairi aénei ua maitihia oia ei generala faatere no te mau nuu atoa tei tamaí i Purusia. Na'na iho i faatere i to tatou mau faehau e no to'na ite rahi e te tauturu ta'na i farii no te mau hau, ua manuia ta tatou titauroa. Ua faaturahia taua taata ra e te mau hau rarahi e ua rahi te mau parau maitai tei faaite-noa-hia no ta'na faatereraa.

I te 22 no Tenuare i te oire o Constantinople i te fenua Turetia, ua paapaa e 1,000 fare i te auahi. Ua parauhia, na te reira auahi i faariro ei 5,000 taata e mau taata fare ore.

Ei tautururaa no te feia veve. Mai te matahiti 1922, ua faatia te mau taata no te fenua Ireland e 17,000 fare no te feia veve o to ratou fenua ra. Te imi ra ratou i te ravea ia ore te mau taata veve i rotopu ia ratou e ati, E te tamata atoa ra ratou ia faaore i te ati o te tupu i te mau oire rahi, oia hoi, te ohipa ore. E hoé ahuru ma piti milioni dara tei horohia ei tautururaa e te hau no te faatiaraa i te mau fare.

I na mahana i mairi aénei ua tupu te hoé ati mataí i ó Amerika e no taua ati nei ua roohia te hoé pahi Italia i te peapea rahi e te riáriá hoi. E pahi ferete taua pahi ra e no reira e toru ahuru e ma piti noa iho taata i nia ia'na, oia hoi' te mau mataro e te raatira. Ua haamata te riu i te tomo i roto e noa'tu ta ratou itoitoe i te paumu noa, ua haere noa te riu i te rahiraa. I reira ua taa ia ratou e, ia maoro rii â e tomo te pahi i tua. Te vai ra râ te tahi peapea rahi na ratou, oia hoi, ua parari roa te mau boti hoehoe i te mau are miti tei haere na nia iho i ta ratou pahi. Ua roaa râ ia ratou te ora i te mea e, te vai ra ta ratou radio. Ua hapono noa ratou i te parau e i te hopea ua faaroohia ta ratou mau parau e to te hoé pahi, o Amerika to'na i'oa. No te ite rahi no te mau raatira i nia ia Amerika, e te mataú ore no te mau mataro, ua faaorahia te mau taata no te pahi Italia. Ua pepe râ te tahi pae o ratou no te miti rahi. I muri aé i to ratou faarueraa'tu i to ratou pahi ua tomo roa oia i tua. Ua mauruuru roa te mau taata i to te pahi "Amerika" no ta ratou ohipa ra.

Alma G. Burton Imprimeur,
Pue Brea et de la rue Dumont d'Urville, Orovini, Papeete